

## О Б Р А З Л О Ž Е Н Ј Е

### UZ MREŽNA PRAVILA DISTRIBUCIJE JAVNOG PREDUZEĆA ELEKTROPRIVREDA BOSNE I HERCEGOVINE DIONIČKO DRUŠTVO-SARAJEVO

Regulatorna komisija za električnu energiju u Federaciji Bosne i Hercegovine (u daljem tekstu: FERK) ovim obrazloženjem objašnjava pravnu i činjeničnu osnovu za usvajanje prijedloga Mrežnih pravila distribucije Javnog preduzeća Elektroprivreda Bosne i Hercegovine dioničko društvo Sarajevo (u daljem tekstu: Mrežna pravila).

Obrazloženje je sačinjeno da bi se omogućilo javnosti razumijevanje pravne osnove koju FERK mora uvažavati u postupku donošenja opštih akata kojima se, na osnovu zakonskog ovlaštenja, na opšti način uređuju pravni odnosi u cilju razrađivanja i primjene pojedinih zakonskih odredbi. Obrazloženje također objašnjava kako su kreirana Mrežna pravila, koja će osigurati otvoren, transparentan i efikasan proces pogona i vođenja distributivne mreže u elektroenergetskom sistemu, kao i definisanje tehničkih i drugih uslova za priključak korisnika distributivne mreže koja mora biti dostupna svim korisnicima na objektivnan, transparentan i nediskriminirajući način, a sve u cilju nesmetanog funkcionisanja tržišta električne energije.

#### I. PRAVNI OSNOV

**Zakon o električnoj energiji („Službene novine Federacije BiH“ broj 41/02, 24/05 i 38/05) i Statut Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04)**

Radi ostvarenja ciljeva određenih Zakonom o električnoj energiji (u daljem tekstu: Zakon), osnovan je FERK čije su nadležnosti propisane članom 14, dok su Statutom Regulatorne komisije za električnu energiju u Federaciji Bosne i Hercegovine određeni poslovi iz nadležnosti FERK-a i aktivnosti u vezi sa istima.

Članom 43. Zakona, pored predmeta Mrežnih pravila, propisano je da Mrežna pravila predlaže operator distribucije u saradnji sa Nezavisnim operatorom i distributerima, a donosi Regulatorna komisija, kao i da se Mrežna pravila objavljuju u „Službenim novinama Federacije BiH“.

## II. RAZLOZI ZA DONOŠENJE MREŽNIH PRAVILA

Osnovni razlog za donošenje Mrežnih pravila je definisanje elemenata za sigurno i pouzdano funkcionisanje distributivne mreže u skladu sa usvojenim standardima kvalitete, uz osiguranje priključka na distributivnu mrežu sadašnjih i budućih korisnika mreže na objektivan, transparentan i nediskriminirajući način, a koji omogućava postizanje ciljeva koji su Zakonom postavljeni pred sve učesnike na tržištu električne energije u Federaciji BiH, kao i ciljeva koji su postavljeni FERK-u kao regulatornom tijelu na tom tržištu.

## III. PREDMET RAZMATRANJA MREŽNIH PRAVILA

Mrežnim pravilima, u skladu sa članom 43. Zakona o električnoj energiji, propisuju se tehnički i drugi uslovi za priključak korisnika na mrežu, tehnički i drugi uslovi za siguran pogon elektroenergetskog sistema radi pouzdanog snabdijevanja kvalitetnom električnom energijom, postupci pri pogonu elektroenergetskog sistema u kriznim stanjima, tehnički i drugi uslovi za međusobno povezivanje i djelovanje mreža.

U okviru predmeta ovih Mrežnih pravila je: upravljanje distributivnom mrežom i granice nadležnosti, normalno stanje i stanje sa smetnjama, usluge u distributivnoj mreži, rasterećenje mreže uzrokovano kriznim stanjem elektroenergetskog sistema, posebne usluge, kvalitet napajanja električnom energijom, planiranje pogona distributivne mreže, preopterećenje distributivne mreže, kvalitet isporučene električne energije, planovi razvoja distributivne mreže, planiranje i izgradnja transformatorskih stanica 110/x kV, tehnički uslovi na mjestima spajanja mreža, kriterij n-1, razmjena podataka, tehnički uslovi za priključenje na distributivnu mrežu, povratno djelovanje na distributivnu mrežu, priključenje i pogon elektrane, baze podataka, analize i izvještaji i godišnje izvještavanje.

## IV. SVRHA OBRAZLOŽENJA

Svrha obrazloženja je informisanje javnosti o činjeničnim i pravnim osnovama Mrežnih pravila sa rješenjima pojedinih pitanja iz ove oblasti.

FERK je istovremeno svjestan da je materija Mrežnih pravila vrlo stručna, kompleksna i zahtjevana. Ona potiče zanimanje i obavezu da se primjena ovog dokumenta kontinuisano prati, kritički preispituje i valorizuje, a kako se aktivnosti budu razvijale, vjerovatno će se osjetiti potreba za izmjenama i dopunama ovih Mrežnih pravila i FERK se neće uzdržavati od istog, ako se ukaže potreba.

## V. PLANSKE AKTIVNOSTI

FERK je u Početnoj dozvoli za rad – licenci za obavljanje elektroprivredne djelatnosti distribucija električne energije broj 06-03-573/09/05 koju je 01.12.2005. godine

izdao Javno Preduzeća Elektroprivreda Bosne i Hercegovine dioničko društvo-Sarajevo, u tački 4.10. odredio obavezu izrade prijedloga Mrežnih pravila distribucije.

U cilju osiguranja transparentnosti i javnosti postupka izrade i donošenja Mrežnih pravila, a slijedeći osnovna načela rada, kao i pravila i propise FERK-a, donesenim radi provođenja Zakona o električnoj energiji, FERK je 08.09.2006. godine donio Odluku o postupku donošenja Mrežnih pravila br. 05-07-707-07/06 („Službene novine Federacije BiH“ broj 55/06) kojom je naložio imaćima početnih dozvola za rad – licenci za obavljanje elektroprivredne djelatnosti distribucija električne energije da nakon pripreme nacrt Mrežnih pravila iste ponude zainteresovanim licima na komentare, primjedbe i sugestije, te da uvažavajući pisane i usmene komentare zainteresovanih lica na nacrt Mrežnih pravila, koje imaći dozvola ocijene opravdanim i osnovanim, izrade prijedlog Mrežnih pravila i da prijedlog Mrežnih pravila, sa izvještajem o provedenom postupku dostave FERK-u.

U skladu sa navedenom Odlukom, Javno preduzeće Elektroprivreda Bosne i Hercegovine dioničko društvo-Sarajevo je dostavila FERK-u Prijedlog Mrežnih pravila distribucije pod brojem 06-03-1070/06 dana 04.12.2006. godine.

Obzirom da je FERK 23.05.2008. godine donio Opšte uslove za isporuku električne energije („Službene novine Federacije BiH“ broj 35/08), FERK je pored pažljive analize dostavljenog prijedloga Mrežnih pravila distribucije odredbe istih analizirao i u odnosu na donesene Opšte uslove za isporuku električne energije. Obzirom na navedeno, FERK je 10.07.2008. godine, donio Zaključak broj 04-07-791-01/08 kojim je naloženo Javnom Preduzeću Elektroprivreda Bosne i Hercegovine dioničko društvo-Sarajevo da u FERK do 15.09. 2008. godine dostavi dopunjeni i izmjenjeni prijedlog Mrežnih pravila distribucije.

Postupajući po Zaključku FERK-a, Javno preduzeće Elektroprivreda Bosne i Hercegovine dioničko društvo-Sarajevo je dana 14.10.2008. godine pod brojem 06-03-1107/08 dostavila dopunjeni i izmjenjeni prijedlog Mrežnih pravila distribucije. Obzirom da je Javno preduzeće Elektroprivreda Bosne i Hercegovine dioničko društvo-Sarajevo provela postupak donošenja Mrežnih pravila distribucije u skladu sa odlukom FERK-a broj 05-07-707-07/06 od 08.09.2006. godine, te da su ista dopunjena i izmjenjena u odnosu na donesene Opšte uslove za isporuku električne energije, FERK je putem svoje web stranice obavijestio javnost o dostavljenom prijedlogu Mrežnih pravila distribucije 15.10.2008. godine i istovremeno omogućio javnosti preuzimanje sadržaja istih. Istog dana FERK je navedeni prijedlog dostavio i Elektroprenosu Bosne i Hercegovine a.d. Banja Luka i Nezavisnom operatoru sistema u Bosni i Hercegovini, te ih pozvao da dostave svoje pisane komentare u FERK do 22.10.2008. godine.

U skladu sa članom 43. Zakona, FERK je nakon razmatranja izmjenjenih i dopunjenih Mrežnih pravila, prijedlog Mrežnih pravila distribucije stavio na dnevni red XVI redovne sjednice FERK-a.